

74

206

206

3654

DISCOVRS
SVR L'ESTAT
PRESENT, DES
affaires du Royaume.

J



A PARIS,

De l'Imprimerie de FRANÇOIS
HUBERT, rue S. Jacques à la
Bible d'Or.

1672

M. D. C. XVI.

ACC 83-101(206)

DISCOVRS.

TOut ainſi que les cantarides ſ'attachent volontiers aux roſes les plus eſpanoüyes : De meſme, c'eſt le propre de la calomnie que de ſe prendre à la vertu la plus eminente, n'y ayant ſorte de fauſſeté dont les langues malignes ne taſchent de raualler la gloire, qui eſt iuſtement deuë au merite d'autrui. S'il y a iamais eu ſiecle auquel ceſte Furie ſe ſoit detachée, nous pouuons veritablement dire que ç'a eſté au noſtre. Car que peut l'Enfer vomir d'iniurieux, qui ne ſoit ſorty de la bouche & de la plume de quelques forcenez, qui conuertiffans la verité en menſonge ont par l'inſolence & par l'audace de leurs inuectiues tellement choqué la reputation des plus innocens, qu'il ſembloit n'y auoir plus de loüangen y d'honneur à bien faire. La rage & la fureur de tels maniaques ſ'eſt deſbordée iuſques là, que de n'eſpargner les images viuantes de la Deité, la reuerence deſquelles eſt ſi ſacro-saincte & religieuſe, que meſmes c'eſt blaſpheme & impiété que d'interpreter ſiniſtrement la

moindre de leurs actions : Mais comme les fleches qu'on décoche vers le Ciel semblent bien y aller, & toutesfois ne le touchent pas: De mesme telles faussetez & calomnies offencent si peu ceux contre qui on les espend, que leur vertu au contraire s'en rend tant plus illustre, ne plus ne moins qu'une goutte d'eau salée qu'on jette dans une fontaine d'eau douce, en rend par une certaine contre-poincte la saveur beaucoup plus agreable.

C'est ce qui a tousiours faict genereusement dédaigner à la Royne Mere du Roy, tous les faux bruiets qu'on a semez contre son gouvernement, se contentant de l'esjouissance de sa conscience, & du tesmoignage des plus gens de bien, qui vuides de passion, parlent des choses sans déguisement. Ce n'est pas que donnant cela à la douceur accoustumée de sa Majesté, la tache & la honte n'en demeure à iamais sur le front de nostre nation, comme ingrattes du bien qu'elle a receu de ceste grande Princesse. Car laissant à l'Histoire de raconter à la posterité les merueilles de son administration, depuis la perte, à iamais déplorable du GRAND HENRY, ie diray seulement qu'il faudroit surmonter

le Diable en calomnie, quoy qu'il en soit le pere & l'auteur , si on ne confesse ingenuëment, que durant la minorité du Roy, cest Estat s'est conserué en plus de tranquillité qu'il ait fait sous la Regence d'aueune Princeſſe, qui ait iamais pris le gouuernail de ceste Monarchie , toutes choses y ayās esté si calmes, qu'il ne s'y est eleué aucuns orages ny guerres ciuilles. Et si le Roy entrant en sa majorité il y a eu quelques vns , qui ayans la voix de Iacob, portoient les mains d'Eſaü , iettans la discorde dans le sein de la France , & rauageants ses Prouinces, comme s'ils fussent entrez en vn pays de conqueste, la Royne neantmoins, semblable à vn Medecin humain & pitoyable , au lieu du feu & du cautere , a apporté de si doux remedes à ceste calamité, que pardonnant par sa clemence, à ceux qu'elle pouuoit, si elle l'eust voulu seuerement chastier par sa iustice, elle a tout oublié, voire par excez de bonté , comme qui recompenseroit le crime, elle a fait du bien & de l'honneur à tels qui ne meritoient par leur rebellion, que de la honte & du deshonneur.

Or comme l'aragne tire son venin des mesmes fleurs, dont l'abeille fait son miel,

il y a eu aussi de ces gens là, qui au lieu de recognoistre par leur obeissance, les gratifications qu'ils receuoient d'une main si liberale, ont retourné à leur vomissement, & conuertty en poison, ce qui leur deuoit estre en aliment. Et par ce qu'ils se recognoissoient estre foibles de nom & d'autorité, pour esclorre leurs mauvaises intentions, il falloit qu'ils se courussent de la qualité d'un plus grand qu'eux pour paillarder sous ce manteau, c'est à dire, pour en abusant du pouuoir d'un premier Prince du sang, retourner derechef à brouiller l'Estat, à troubler le repos public, & nous engager plus auant que iamais dans la confusion, le pauvre peuple n'ayant recueilly qu'à demy, le bien que Dieu sembloit luy donner ceste année en abondance, pour recompense de sa derniere perte & desolation.

C'est ce qui a contrainct leurs Majestez de pourvoir soudain au salut commun de la France, & d'arrester pres d'elles Monsieur le Prince de Condé, afin qu'ostant l'occasion à certains esprits violens d'abuser dauantage de sa qualité, le Royaume se contienne en vne si profonde paix, qu'il soit aussi florissant sous le regne du

Roy , qu'il a oncques esté sous l'Empire d'aucun deses predecesseurs. Ce qui est à esperer , si l'authorité Royale demeure si absoluë, qu'elle voye toute autre grandeur humiliée à ses pieds. Aussi n'est-il pas moins monstrueux de voir plusieurs attirer à eux le pouuoir du Souuerain, qu'il est contre nature de voir plusieurs testes sur vn corps. Cela estant donc arriué pour les iustes raisons que leurs Majestez en ont euës, c'est à nous, comme fidelles subiects, de ployer à leurs volontez, sans nous enquerir plus curieusement si elles auoient à le faire ou non : Car ce n'est pas à nous de penetrer dans le secret des conseils d'un grand Roy , ny d'en examiner les motifs selon nos sens, & à la mesure de nostre passion. Nous ne deuons non plus estimer que la personne de Mōsieur le Prince, estât cher comme elle est à leurs Majestez, qu'elles ne la conseruent avec tāt de soing & de bon traictement, que la reseruant pour leur seruice, & pour la seureté & appuy de l'État, sa liberté ne luy soit renduë, lors qu'elles iugeront qu'elle sera au bien du public, & mesme du sien particulier, les Roys n'espargnans pas mesmes leurs propres Enfans, quād il y va du repos de leurs

peuples, la feuë Royne Mere nous en ayāt laiffé l'exemple en la personne de Monsieur, frere vnique du Roy Henry III. qu'elle arresta prisonnier, sur l'aduis qu'elle eut que certains broüillons l'auoient desbauché de son deuoir.

S'il y a cependant quelques ames vlcérées, qui controllans les actions de leurs Majestez, se formalisent de cela, & le prennent pour pretexte de se porter à vn nouveau soufleuement, il est à esperer que Dieu, protecteur de l'innocence d'vn ieune Roy, sçaura tellement armer son bras, que secondé de ses bons & fidelles serui-ieurs, il s'opposera si puissamment à leurs efforts, que la confusion en tombera sur la teste de ceux qui seront les auteurs de la faction. Leurs Majestez ont desia des arres si visibles de la fidelité des bons François, que Paris (comme le Chef des villes du Royaume, & dās laquelle elles ont voulu faire ceste action, comme sur le theatre le plus eminent de la France, pour témoigner à tout le monde la iustice de leur proceder) s'est, dy-je, contenu en si grande obeissance, qu'il n'y a bourgeois homme de bien, qui ne tesmoigne de l'approuuer sans aucun murmure ne contredit. Et s'il
y a eu

y a eu quelques-vns du menu peuple qui se soient violementement comporte, se vengeans sur des choses inanimées, en hayne d'un particulier, par l'induction de ceux qui deuoient plustost recourir à l'eau qu'au feu, leurs Majestez oublient neantmoins le tout par leur bonté & clemence. De sorte que soustenuës des villes capitales du Royaume, des Officiers de la Couronne, des Cours Souueraines, & de la Noblesse, qui tous ensemble offrent leur tres-fidelle ser-vice, pour l'interest commun qu'ils ont à la manutention de l'autorité Royale, dans l'establissement general de laquelle est en-clos le repos & la fortune des particuliers, il est à esperer avec l'ayde de Dieu, qu'elles donneront si bon ordre à toutes choses, que la iustice de leurs armes protegera la liberté des peuples, empeschans qu'ils ne soient opprimez, comme elles ont desja pourueu à la seureté de Paris, par les bonnes troupes d'infanterie & de Caua-lerie qu'elles ont logées dix lieuës à la ronde.

La pluspart des membres du corps estās ainsi reunis sous leur Chef, s'il y a quelques vns qui s'en retranchent, le Roy ne laissera pas d'estre seruy & assisté, ainsi que cest

10
Empereur, qui apres la mort de Britannicus disoit, qu'ayant perdu le secours de son frere, toute s^{on} esperance gisoit en la Republique. Car si quelques Grâds n'ayans que leur passion pour conseil, tombent en cest aveuglement, que de se soulever contre leurs Majestez, le mal sera doublement à plaindre, par ce qu'avec leur ruine infailible, elles regretteront que des personnes de ceste qualite' manquent d'estre aupres d'elles, pour preuve d'affection à leur service. Ce que nul d'eux ne leur peut tesmoigner qu'en embrassant, sans difference quelconque, la querelle du Fils & de la Mere, tant l'interest des deux est commun & inseparable. Que ces Messieurs là considerent que ce n'est pas chose excusable au subiect, que de disputer sa cause l'espée à la main contre son Roy. C'est aux pieds du Prince, comme à des Autels de refuge où l'on doit recourir, pour impetrer pardon si on a failly, sans porter iamais les choses si à l'extremite', que le mal qu'on a faiet, fasse viure en meffiance ceux qui le commettent, la synderese leur estant vn perpetuel bourreau qui les tenaille & martirise. Mauuaise maxime au seruiteur, que de se vouloir faire craindre à son Maistre!

Je desire de bon cœur, que ce mal-heur n'arriue à aucun d'eux, ains que se rendans capables d'un bon conseil, ils marchent sur les pas de leurs deuanciers, & qu'à leur exemple ils n'ayent pour obiet que le seruice de leur Roy. C'est là où trauaille aujourdhuy de tout son pouuoir Monsieur le Duc de Guise, taschant de ramener vn chacun auprez de leurs Majestez. Non que ie n'aye si bonne opinion de la fortune de cest Estat, que quand les plus opiniastrs se reculeroient de leur deuoir, le seruice de leurs Majestez ne laisseroit pas pourtant de se faire. Car encores que les Princes surpassent en naissance la commune Noblesse, il y en a neantmoins de ceste classe qui sont si genereux, qu'il portent des cœurs de Princes, & qui reuestus de l'autorité du Souuerain, font quelquesfois des exploicts si glorieux, qu'ils ne cedent à ceux des plus illustres Princes. La France est vn champ qui produict force courages de ceste trempe, & qui au defect de ceux à qui les grandes charges sont deuës par leur extraction, ne manqueront pas de les remplir dignement, quand il plaira à leurs Majestez de les employer.

Nostre Histoire est pleine de plusieurs

faicts d'armes des Capitaines de nostre nation, qui ont souuent releué ceste Couronne panchante, comme firent vn lean, bastard d'Orleans, vn la Hire, vn Ponton de Xaintrailles sous Charles septiesme, Dieu armant mesme en ce temps là le bras d'une simple fille, pour la protection miraculeuse de cest Estat. Aussi les Romains deferoient tât à la valeur des particuliers, qu'ils tiroiēt quelquesfois du manche de la charuē les Generaux de leurs armées.

C'est donc aujourd'huy, ô braue & va-
leureuse Noblesse! qu'il faut tesmoigner
vostre zele & vostre amour enuers leurs
Majestez, à fin que protegeans l'honneur
& la dignité de la Monarchie, vous n'en
souffriez pas le démembrement, par ce
qu'en perdant l'autorité du Souuerain,
vous perdriez vostre pere commun, &
tomberiez comme Esclaves sous la tyran-
nie & domination de quelques particu-
liers, qui secoüans par leur felonnie le
joug de l'obeissance qu'ils doiuent à leur
Roy, rauiroient tout ensemble vostre li-
berté. Je parle à vous tous, sans differen-
ce de Religion, puis qu'il ne s'agist icy que
de la grandeur de l'Estat, & que par la
bonté de nos Roys vous estes tous in-

différemment admis aux charges & honneurs de la France, leurs Majestez n'ayans eu nul dessein par ceste action, d'alterer la moindre chose de leurs Edicts. La pluspart des Seigneurs de la Religion prétenduë reformée sont aujourdhuy à la Cour en credit & en estime, sans que leurs Majestez entrent en aucun ombrage de leur seiour aupres d'elles, tant elles ont de confiance en eux. Et si Monsieur le Marechal de Bouillon s'est seul retiré d'entre-eux, il est croyable que comblé d'années & de biens, il se sçaura si prudemment cōduire, qu'il viura le reste de ses iours en paix dans sa maison, sans attirer sur sa teste, ny sur celle de sa posterité, l'indignation d'un grand Roy, & la malediction de tout le peuple.

Voila ce que nous auons à attendre du salut de la France, sous les heureux auspices de leurs Majestez, lesquelles en ceste tourmente se sçauront seruir des pilotes plus experts, pour faire surgir ce vaisseau à bon port. Car encores que plusieurs vents soufflent au naufrage: si est-ce que les Anges tu

seulaires de cest Estat , veilleront à sa
 conseruation , n'estant sans exemple
 que la ieunesse des Roys soit ainsi agi-
 tée. Vn Saint Loüis en sentit les ef-
 fects, par les mouuemens que luy sus-
 citerent vn Comte de Bologne, vn
 Duc de Bretagne, & vn Comte de
 Champagne, sous le faux zele & pre-
 texte du bien public ; qui est la cou-
 leur dont tous perturbateurs teignent
 ordinairement leurs mauuais desseins:
 Mais la prudence de la Royne Blan-
 che de Castille la Mere y sceut si bien
 remedier, qu'apperceuant (remar-
 que l'Histoire) que sous ombre
 d'un pour-parler, ils se vouloient
 saisir de la personne du Roy, Elle
 eut recours à son gros canon, à sçauoir à la
*Majesté du Roy, & menace ces Princes ar-
 mez de les foudroyer, les declarans rebelles,
 & criminels de lese Majesté, s'ils n'obeis-
 soient. La fidelité des Parisiens est ce-
 lebrée en ceste action, ayans pris les
 armes, & s'estans mis en campagne
 pour retirer le Roy, & pour rendre ces
 Ligueurs tant plus odieux, & autoriser
 le bon mesnage de la Royne. Le Comte de
 Champagne, dit vn autre Historien,*

ayant mal fondé sa plainte, & voyant les affaires mal baster pour luy, recourut à la misericorde du ieune Roy. Et estant le Roy deuenu grand, il sceut bien venir à bout de tous les seditieux. C'est, adioust-il, une chose fatalle à tous Princes venus en bas aage, à estre Roys, & mesmement aux Roys de France d'auoir tousiours au commencement de leur regne des troubles & des seditions, & d'auoir esté tourmentez par aucuns de leurs subiscts desireux de nouueauté : Mais aussi quand ils sont deuenus grands, ils ont bien sceu chastier ceux qui les ont broüillez en leur ieunesse.

Du hail-
lan au
liure de
l'estar
des af-
faires de
France.

Si Blanche de Castille fut si heureuse que de regner ainsi absoluë, nous ne nous promettons pas moins de felicité d'une Marie de Medicis, laquelle reçoit aussi du Roy le mesme pouuoir & le mesme honneur que rendit Salomon à sa Mere. Car au témoignage de la parole de Dieu ce Roy se leua au denant d'elle & l'adora, & se mist sur son trône. Et fut mis un trône pour la Mere du Roy, laquelle s'asist à la dextre d'iceluy. Si bien que nous ne pouuons reuerer le Fils, qu'en honorant la Mere, & receuant les commande-

3. Reg. 2.

demens des deux, sans difference ny distinction quelconque. Et encores que l'indignation du Roy soit tresiuste: si est-ce que suivant la declaration que sa Majesté a faite aux yeux de cet auguste Senat, elle ouure les bras à ses subiects, semblable à vn de ces Césars, qui clement & pitoyable disoit qu'il aymoît mieux sauuer vn Citoyen; que de tuer mille ennemis. Dieu inspire donc vn si bon conseil au cœur des absents, que touchez de zele & d'amour enuers leur Patrie, ils ne s'enueloppent dans vn plus grand mal, ains retournans volontairement au seruice du Roy, ils ne se fassent achepter comme mercenaires, ny n'arrachent des mains de leurs Majestez aucune chose qu'il leur laisse ceste apprehension en l'ame, de ne pouuoir iouyr seurement, de ce qu'ils auroient plustost extorqué par violence, que receu amiablement par voyes iustes & raisonnables.

F I N.

